

Ye's ner jwan' mke' Pab lo yodo' Corintios

Pab ni dyux lo yodo' Corintios

¹ Na Pab, mbrez Dios na nak na apóst chan' Jesucrist jwan' xa nchola's Dios. Thipta kon wes Sóstenes,

² ngeke'n ye's re' lo re men jwan' nak yodo' chan' Dios nzi yez Corinto,* xa' jwan' mbli nay-onla Crist Jesús. Mbrez Dios xa' sa ak xa' men nayon kon re xa' jwan' nyeke' lo le Jesucrist Xa' nak xwan' na', oneja plo nzi xa', Xa' Nyebe' lo re xa' ya nde Xa' Nyebe' lon'.

³ Yalwen nde yalnabe'z chan' Xud na' Dios nde chan' Jesucrist Xa' Nyebe', pkaya' go'y.

Pab nda' dyux lo Dios

⁴ Thibla' ndan dyux lo Dios por reta go', lo mblo'to Dios yalwen chan' Xa' lo go' por jwan' mbli Jesucrist.

⁵ Tak por Jesucrist sa mda' Dios reta yalwen lo go', re jwan' ta ndyodi's go' nde re ned yalnchak.

⁶ Tak tamod sa mblo' ke lí xki's Jesucrist jwan' mdej ná' lo go'.

⁷ Nde jwan' re' li sa nekthib yalwen chan' Dios na'akjwadta lo go', laja ngembed go' bere Jesucrist Xa' Nyebe' lon'.

* **1:2 1:2** He. 18:1.

⁸ Nde Dios li sa ne tyo go' lo xki's Xa' axta ke yoxo'b be'y, sa ngen cho ke' yalke yek go' lo sen' ye'd Jesucrist Xa' Nyebe' lon'.

⁹ Gal' nak Dios, lo mbrez Xa' go' sa thipta ak go' kon Xin' Xa' Jesucrist, Xa' Nyebe' lon'.

Nchak rol re men nzi yodo'

¹⁰ Wes na, ptan na, lo le Jesucrist Xa' Nyebe' lon', nya'b na lo go' sa thipta gok di's re go' nde na'akrolta go', che'la thipta xgab pkeno go' nde thita gok go'.

¹¹ Wes na nde ptan na, re xa' liz Cloé mdej lon ke nzo yalbyo xij go'.

¹² Jwan' ndotej na nak, nzo go' mbez: “Na nak men Pab”; “na nak men Apolos”;† “na nak men Cefas” nde “na nak men Crist”.

¹³ ¿Cho ngaksa' nak rol Crist? ¿Cho Pab nguj lo kruz por go'? ¿O lo le Pab mbro'le go'?

¹⁴ Ndan dyux lo Dios tak nek thib go'ba na'mblo'let na, ben'ta Crispo‡ nde Gay§ mblo'len,

¹⁵ sa nek thib go' na'gabta ke lo le Pab mbro'le go'.

¹⁶ Noga re xa' liz Estéfanos* mblo'len nde na'telasta na tez nzo cho tedib xa' mblo'len.

¹⁷ Tak na'mtel'ta Crist na go'len men, che'la mtel' Xa' na sa tej na di's wen chan' Jesucrist; nde na'lit nay kon yalnchak chan' men, sa na'gotalta na jwan' nguj Crist lo kruz.

Crist nak yalne nde yalnchak chan' Dios

† 1:12 1:12 He. 18:24. ‡ 1:14 1:14 He. 18:8. § 1:14 1:14 He. 19:29; Ro. 16:23. * 1:16 1:16 1 Co. 16:15.

¹⁸ Tak di's ta ndej na nguj Crist lo kruz jwan' kow naka lo re xa' ngeteta'b, le' lo re na' ta lya', yalne chan' Dios naka

¹⁹ Ta xa nchabka lo xki's Dios:
Tolu'x na yalnchak chan' re xa' nchak,
nde go'tal na yalnchen chan' re xa' ta nchen.†

²⁰ ¿Ma re xa' nchak sa? ¿Ma re xa' nte'd ley? ¿Ma re xa' taja nzyal toz ndyodi's? Tak re yalnchak lo izyo, Dios mblilala jwan' na'lida sin'.‡

²¹ Dios nak ti Xa' nchen toz, na'nda'd Dios di's ngyolo men Dios kon yalnchak chan' men, che'la mbro' lazo' Dios tola' Xa' re men jwan' ndli lazon' Xa' kon xki's Dios jwan' ta ndej ná' lo men nde te'nye ndyak men naka di's kow.

²² Tak re men judí, nya'b xa' yalbseye, le' re xa' grieg nkwan' xa' yalnchak,

²³ ná' nda' kwent chan' Crist Xa' mke lo kruz, le' re xa' judí, jwan'na nak jwan' ncheb xa', nde par re xa' na'nakta judí jwan' kow naka lo xa'.

²⁴ Le' lo re xa' jwan' mbrez Dios, one cho xa' judí o xa' na'nakta judí, Crist nak yalne nde yalnchak chan' Dios.

²⁵ Tak jwan' kow chan' Dios ta ndyak re mena, mas ngenoy yalnchen ke lo yalnchak chan' mbi'; le' jwan' ta ndyak men nala chan' Dios, mas ney ke lo yalne chan' mbi'.

²⁶ Wes na, ptan na, ptela's go' ke Dios mbrez go', te'nye ngabta go' nak men nchak xa nak xgab men, ngabta go' ngeno yalnyebe' nde ngabta go' nak xa' ro.

²⁷ Che'la re men ne yek na' par lo izyo re' mblí Dios sa ryo'yantho re xa' nchak xis izyo re', nde

† 1:19 1:19 Is. 29:14. ‡ 1:20 1:20 Is. 44:25.

re xa' nala nzo lazo'n mblí Dios sa ryo'yantho re xa' ne nzo lazon'.

²⁸ Men na'ntakta, men mblo'tal ta men men nde re men jwan' ngencho kwan nak, re men ya mblí Dios, sa lux xa' re jwan' ta ndyak men ntak toza,

²⁹ ta sa nek thib men naxyal'ta lo Dios.

³⁰ Nde le'ga Dios mbli sa thita nak go' kon Crist Jesús, noga mbli Dios sa mblilal Crist na' men nchak, mblilal Xa' na' men gal' lo Dios, mbli nayon Xa' na' nde mtola' Xa' na'.

³¹ Jwan' nasa, xa nchabka lo xki's Dios: "tez nzo cho nchola's xyal', ndablo xyal'no xa' Xa' Nyebe'."§

2

Pab ndej Jesucrist Xa' mke lo kruz

¹ Jwan' nasa, wes na, ptan na, sen' ngwatej na xki's Dios lo go', na'mblit nay kon di's bxa' nekla mbli nay kon yalnchak chan' men lo izyo.

² Tak sen' mdon xij go' ngentra kwan mdodi's na, be'nta kwent chan' Jesucrist mdodi's na, Xa' ta mke lo kruz.

³ Sen' mdon xij go', nala ngo lazo'n, mxi'd na nde mzyeb na;*

⁴ nde re di's jwan' mnin lo go' nde xki's Dios jwan' mdej na lo go', na'ngokte di's kil' nekla yalnchak chan' men. Che'la kon Mbi Nayon nde yalne chan' Dios mnin lo go',

⁵ sa jwan' ta ndlipa lazo' go' na'tyobsa'de xis yalnchak chan' mbi', le'y tyobsa' xis yalne chan' Dios.

§ 1:31 1:31 Jer. 9:24. * 2:3 2:3 He. 18.9.

Kon Mbi Nayon chan' Dios ndlo'to Xa' jwan' nak Xa'

⁶ Mbay, le' re xa' ta jwin ngol xgab na' lo xki's Dios, lo re xa' ya ndyodi's ná' kon yalnchak. Le' yalnchak re' na'nakte chan' men lo izyo, nekla naka chan' re xa' ta nyebe' lo izyo, le' jwan'na luxka.

⁷ Le' ná' ndyodi's yalnchak chan' Dios ta nzonga's, yalnchak naga's jwan' ngenola Xa' axta sen' tera' tyoxkwa' izyo, yalnaro jwan' ngenosa'la Xa' par na'.

⁸ Nde nek thib men nak sin' ro lo izyo na'ngyenta xa' jwan' re'; tak tez ngyen xa'y, pa ke' xa' Xa' Nyebe' Xa' nak chan' yalnaro lo kruz.

⁹ Ta xa nchabka lo xki's Dios:
Re jwan' nek thib men tera' wi', re jwan' nek thib
men tera' gon,

Nde nek thib men tera' li xgab, re jwan'na
ngenola Dios par re men nke' lazon' Dios.†

¹⁰ Per Dios mblo'xo'b jwan' re' lon' por Xbin Xa',
tak Xbin Dios jwin nkwan' Xbi reta jwan', axta re
jwan' naga's toz nzo nkwan' Xbiy.

¹¹ Tak ¿Cho ti men mne jwan' nzo lazo' tedib
men, ben'ta le'ga xbin men mney? Taga' ngenta
cho mne kwan nak xgab Dios, ben'ta Xbin Dios
mney.

¹² Nde na'mkaya'd na' xbi chan' men lo izyo, le'
na' mkaya' Xbi nda' Dios, sa yolon' re jwan' nda'
Dios lon'.

¹³ Jwan' re' ta ndej ná' lo go', na'ndejta ná'y
kon yalnchak chan' men, le'y ndej ná' jwan' xa
ndlo' Xbin Dios, ndli rsin' ná' xki's Xbin Dios sa
ngo'xkan ná'y lo re men ndono Xbin Dios.

† 2:9 2:9 Is. 64:4.

¹⁴ Le' men jwan' na'ndonod Xbin Dios na'ndlid lazo' xa' jwan' nak chan' Dios, jwan' kow naka ndyak xa'. Na'yenta xa'y, tak ben'ta Xbin Dios ndli sa nchen mena.

¹⁵ Men jwan' ndono Xbin Dios, toyal yen men reta jwan' nde ngencho li gan ke' yalke yek men.

¹⁶ Tak lo xki's Dios nchab: “¿Cho mbyolo jwan' nak xgab Xa' Nyebe'? ¿Cho li gan tote'd Xa'?”[‡] Le' na' ndono xgab xa nak xgab Crist.

3

Re xa' jwan' ndli sin' lo Dios

¹ Jwan' nasa, wes na, ptan na, na'ndlit na gan ndodi'snon go' xajka men ndono Mbi Nayon, che'la mnin lo go' xaga men tera' gal xgab na', xaja men kub lo xki's Dios.

² Jwan' na'naganta mblo'n lo go', xa nak mbed ta nchu' nisa nde tera' ak war yej* nde ta nak go', tera' ak wa go'. Tatka nak go' naya,

³ tak ben' ndli go' re jwan' nchola's bel' go'. Laj ta ben' nzo yalno lazo' go', na'nzal'ta xki's go' nde nchak rol go', ¿Cho najwan'nada nak ben' ndli go' re jwan' nchola's bel' go', ngete go' xajka re men kowa?

⁴ Tak mbez go' lo ta go': “Na liga nak men Pab”, nde tedib go' mbez: “Na nak men Apolos”,[†] go' ndyodi's xajka men bel'la.

⁵ Mbay ¿Cho nak Pab, nde cho nak Apolos? Men ndli sin' lo Dios nak ná', ndlirsin' Dios ná' ndej ná' xki's Xa', tamod sa mbli lazo' go' Jesucrist, nde kad thib ná' ndli ná' jwan' nyebe' Xa' Nyebe' lo ná'.

[‡] 2:16 2:16 Is. 40:13. * 3:2 3:2 He. 5:12-13. [†] 3:4 3:4 1 Co. 1:12.

6 Na mblo bin,[‡] Apolos mbwal'la,[§] nde Dios mbli mxyena.

7 Jwan' nasa, ngen kwan liy cho mblo bin nde cho mbwal'la, jwan' ntak nak Dios ndli nxyena.

8 Le' xa' jwan' ngo bin nde xa' jwan' ngal'la thita sin' ndli xa', tenyega kad xa' yax ka xa' a xa nak sin' mbli xa'.

9 Tak ná' nak men ndli sin' lo Dios, le' go' nak ten' ndli Dios sin'.

Noga nak go' ti yo ro jwan' ngetoxkwa' Dios.

10 Axa nak yalwen jwan' mda' Dios lon, nak na xaja ti maestr nta' yo, na mdi'xa' pto xan', le' tipla xa' xap pto, nde kad thiba xa' ndawi' toz xa' xomod toxkwa' xa'y.

11 Nde ngenta cho li gan kixsa' tedib pto xan', xis jwan' naxsa'la, tak Jesucrist nak pto xan'.

12 Nde xis pto xan' re', nzo xa' xapa kon jwan' or, jwan' plat, ke ntak, ya, yix o yixyi.

13 Tak sin' jwan' ndli kad thiba men yobe'y sen yoxo'b wiz jwan' nya'b Dios kwent lo men, nde wiz ya ye'd Xa' kon bel, nde bel li be' cho sin' mbli kad thiba men.

14 Tez nzo xa' mxap jwan' mxek mbri'd lo bel, xa' ya kaya' jwan' tala's Dios lo xa'.

15 Per tez sin' ta mbli xa' ya yola, tlato yalti xa' tak lux reta rsin' xa', tenye ben' le'ta xa' lya', ta xa ndlya' ti men lo bela.

16 ¿Cho na'nyed go', le' go' nak yodo' chan' Dios, nde len' lazo' go' nzo Xbin Dios?*

[‡] 3:6 3:6 He. 18:4-11. [§] 3:6 3:6 He. 18:24-28. * 3:16 3:16 1 Co. 6:19; 2 Co. 6:16.

17 Tez nzo cho nchola's lu'x yodon' Dios, lu'x Dios xa' ya, tak yodon' Dios nayon naka nde go' nak yodo' ya.

18 Ngen cho kwin'no le'ga lazon', tez nzo cho go' xij re' ndli xgab ngeno yalnchak chan' men lo izyo, xa' ya nakin' ak xaja ti men ngenta kwan mne sa tamod ak xa' ti men nchak.

19 Tak yalnchak chan' men lo izyo naka jwan' na'lida sin' lo Dios. Tak lo xki's Dios nchab: "Dios ndli sa re xa' ta nchaka nchoga xa' le'ga lo kon' xa'."†

20 Nde noga nchab lo xki's Dios: "Nzolo Xa' Nyebe' xgab re xa' nchak, mne Xa' na'lid sin'na."‡

21 Jwan' nasa, nek thib go' na'xyal'nod go' tedib ta men go', tak chan' go' nak reta jwan':

22 one cho Paba, Apoloy, Pedra, izyoy, yalna-bana, yalguja, jwan' ndoyak nayey, jwan' nara' aka, retay nak chan' go',

23 tak go' nak men Crist, nde Crist nak chan' Dios.

4

Rsin' re apóst

1 Jwan' nasa, bwi' go' ná' ke ben' men ndli sin' lo Crist nak ná' nde men ngo'xkan lo go' re jwan' nzo naga's chan' Dios.

2 Le' naya, kad thiba men ta nakaya' sin' jwan' mda' Dios lo xa', ndablo gal' tyo xa'.

3 Le' na, na'ndlit na xgab tez go'ba koxyo go' na o re xa' nak sin', tak nekla na na'ngoxyot na lazo'n.

† 3:19 3:19 Job 5:13. ‡ 3:20 3:20 Sal. 94:11.

⁴ Tak tenye ndyak na na'ndlit na jwan' narax, na'jwa'nada li sa ak na men ngenta xken', per Xa' Nyebe' kwezke xa nak na.

⁵ Jwan' nasa na'koxyod go' nek thib jwan' lo ta tera' yoxo'b be'y, bled go' kebe' ye'd Jesucrist, sa Xa' ko'xob re jwan' nzo naga's lo yal'kow nde ko'xob Xa' re xgab jwan' nzo lazo' re men, nde zyasa kad thiba men kaya' di's wen ryo' ro Dios ben' xa' nzal' men.

⁶ Wes na, ptan na, por yalwen lo go' ndej na re jwan' ndlin nde re jwan' ndli Apolos sa te'd go' lo ná', na'ritda'bta go' lo jwan' ngeni xki's Dios, na'xyal'nod go' tib xa' nde tedib xa' kotal go'.

⁷ Tak, ¿Cho mbli sa nak la men ro? ¿Xanya ti jwan' nkenoa na'nakte jwan' mda' Dios? Mbay tez Dios mda' reta jwan' nkenoa ¿Cho kwan liy nxyal' la, ndyak la le' mkwan' la re jwan' nkenoa?

⁸ Nix nzo lazo' go', ngok rik la go', rey nak go', na'nakin'tra go' ná' tyak men. Jwina tez liga rey nak go', sa thita nyebe' ná' kon go'.

⁹ Tak re ná' ta nak apost ndyak na axta xis mtan' Dios ná', xaja men ta nzal' gaja ná', yalbdij nak ná' lo dib izyo, lo re áng nde lo re men.

¹⁰ Lo ta nke' lazo' ná' Crist ndlilal xa' ná' men na'ngenta xgab yek na', laj le' go' nak men nzo xgab yek na' lo Crist; sen' nalat nzo lazo' ná', le' go' ne nzo lazo' go'; sen' re men nxobyek xa' go', le' ná' ngotal xa' ná'.

¹¹ Axta naya ben' ndyak ná' win, nchek ná', ngenta lar gok ná', ngin xa' ná' nde na'ngenod ná' lizpa ná'.

¹² Mzan ná', tak le' ndli ná' sin' sa ncha ná',* sen'

* 4:12 4:12 He. 18:3.

nke'de men ná', ndli ley' ná' xa', sen' nchubla xa' ná', nxe'k ná'y.

¹³ Sen' ni xin men xis ná', nabe'z ni ná' xis xa', per axta naya ngwi' xa' ná' xaja yixa nde ngotal xa' ná' xaja jwan' xkapa.

¹⁴ Na'ngeket na jwan' re' lo go' sa go'yanthon go', che'la mbez na yek go' xajka xin' na ta nke' toz lazo'n.

¹⁵ Tak tenyega ngeno go' ti si' mil men ndlo' xki's Jesucrist lo go', per na'nakta re xa' ya nak xud go', na nak xud go' tak na mdej di's wen chan' Jesucrist lo go' sa mbli lazo' go' Xa'.

¹⁶ Jwan' nasa, nya'b na lo go', bli go' re jwan' ndlin.†

¹⁷ Jwan' naga sa mtel' na Timoteo lo go', xa' jwan' nke' toz lazo'n xaja xin' na nde nxobye'k xa' Xa' Nyebe'. Xa' lo' lo go' sa te'la's go' mod mban na lo xki's Jesucrist, re jwan' mblo'n re ten' ngete'n nde re yodo'.

¹⁸ Nzo go' xija jwan' toz nxyal' go', nde ndyak go' na'yatwitra na go'.

¹⁹ Per tezka ta' Dios di's, len' wiz re' yatwi'n go'. Zyasa wi'n nyen' cho kwanpa li re xa' taja nxyal'la o ben'ta di'sa.

²⁰ Tak jwan' nyebe' Dios na'nakte ben'ta di's, le'y nchak kon yalne chan' Dios.

²¹ ¿Xomod nchola's go' yatnan go'? ¿Cho kos yo ya'n, o ke' lazo'n go' nde nin di's nagu's lo go'?

5

Xomod ak xa' ta ndobno tedibla ngol

† 4:16 4:16 1 Co. 11:1; Fil. 3:17.

¹ Liga nzo'b di's le' xij go' nzo jwan' bew, nde axta re men na'nzolod Dios na'nchenta ndli xa' jwan'na, tak rida ndli go' nzo ti go' xija ndobno le'ga ngol xud na'.

² ¡Le' go' che'la ngenkwan ndyak go'y! ¿Cho na'ndabloda mas jwin ta' xgaba yek go', sa ko'te go' xa' ta ndli jwan' xkapa xij go'?

³ Di's gal'pa, te'nyega na'ndod yub na, per xbin na ndoga, nde mblila na xgab xomod ak chan' xa' ta ndli jwan' xkapa.

⁴ Sen' lo thita dyopbe go' lo le Jesucrist Xa' Nyebe' lon', nde yalne chan' Jesús Xa' Nyebe' lon' li sa non tyo tya.

⁵ Le' xa' ta ndli jwan' xkapa taya' go' xa' lo Maxu' sa lux re jwan' ndryo' lazo' bel' xa', le' xbin xa' lya' sen' sin be' ye'd Jesús, Xa' Nyebe'.

⁶ Nale'da nak ta nxyal' go'. ¿Cho na'nyed go' nzo ti di's nchab: “lud levadur ndli ndyebes dib ko'b”?†

⁷ Jwan' nasa, blo'te go' xa' ta nak xa nak levadur gox xij go', sa ak go' xa nak ko'b kub jwan' na'ngenta lebadur ta ncha men lo ni pask.‡ Tak Crist nak Mbak Xil' yen' ta ngu' sa mbyax reta xken na'.

⁸ Jwan' nasa, lo lin' ni pask, na'lid na'y kon lebadur gox, nekla kon lebadur chan' jwan' narax nde lebadur chan' jwan' xkap,§ che'la li ne'y kon pan na'ngenta lebadur jwan' nak jwan' gal' nde jwan' lipa.

⁹ Ye's ta mke'n lo go', tya mbez na; na'sal'tad go' re xa' ta ndli jwan' xkap,

* 5:1 5:1 Dt. 22:30. † 5:6 5:6 Gá. 5:9. ‡ 5:7 5:7 Ex. 12:5. § 5:8 5:8 Ex. 13:7; Dt. 16:3.

¹⁰ na'nakte thiptane na'sal'tad go' re xa' lo izyo re', re xa' ta ndli jwan' xkap, re xa' ta ndya'bla's keno masra' jwan', re xa' wan' o re xa' ta nxobyek re mnab, tak tez thiptane na'sal'tad go' re xa' ya, nakin' ryo'te go' lo izyo re'.

¹¹ Jwan' mke'n lo go' nak, na'sal'tad go' kon nek thib xa' ta mbez nak wes, nde ndli xa' jwan' xkap, o re xa' ta ndya'bla's keno re jwan', o xa' nxobyek re mnab, xa' nke'de xis men, xa' guy, o xa' wan'. Re xa' ta ndli jwan' re', ana'tyob go' wa go' kon xa'.

¹² Tak ¿Cho nak na sa goxyon re xa' ta tera' li lazon' Dios? ¿Cho na'naki'nta nerla koxyo go' re xa' ta ndli jwan' narax nzo xij go' ba?

¹³ Tak re xa' ta tera' li lazon' Dios, Dios nya'b kwent lo xa'. Jwan' nasa, blo'te go' xa' xkapa xij go'.

6

Na'yanod go' wes go' yollow

¹ Sen' ngeno go' yalbyo kon tediba men jwan' ndli lazon' Jesús ¿Cho kwan liy sa nda go' lo xa' nak sin', xa' nandlid lazon' Jesús, nde na'yad go' lo men nak yes Dios?

² ¿Cho na'nyed go', le' re na' ta nak xin' Dios, na' jwan' nya'b kwent lo re men ta na'nzolod Dios? Mbay tez na' jwan' nya'b kwent lo re men na'nzolod Dios, ¿Cho na'lid go' gan wi' go' re yalbyo bix ta nzo xij go'?

³ ¿Cho na'nyed go' na' nya'b kwent lo re áng? ¿Nde cho na'akta win' re yalti bix ta ndarid na' re'?

⁴ Jwan' nasa tez nzo go' ngeno re yalbyo bix xij go', ¿Cho kwan liy sa nda go' lo re xa' nak sin', xa' na'nakta yodo' chan' Dios?

⁵ Ndej na jwan' re' lo go' sa tyola's go' lud. ¿Cho na'ngenta thi xa' nchen xij go', masa thib xa', xa' jwan' toyal wi' yalbyo ta nzino go',

⁶ le'ga le' wes go' ngyono go' nde ndaga' go' lo xa' nak sin', xa' na'ndlid lazon' Dios?

⁷ Yalkela naka ta nzo yalbyo xij go'. ¿Kwan liy xana' mas jwin xek go' lo re jwan' narax ta ndlino xa' go' nde lo ndli wan' xa' lo go'?

⁸ Per go', che'la ntoti go' men nde ndli wan' go' lo xa', mbay nde jwan' na ndli go' lo re ta wes go' jwan' ndli lazon' Crist.

⁹ Na'kwin'nod lazo' go' ¿Cho na'nyed go' le' re xa' ta ndli jwan' na'gal'ta nak, na'yoted xa' ten' nyebe' Dios? Nekla xa' ndli re lo yalxkap, nek re xa' ta nxobyek re mnab, nek re xa' nkwin'no sal' na', nek re xa' bi' ta ndyen ak ngol, nek re xa' bi' ncha'xno le'ga ta bi' xa',

¹⁰ nek re xa' wan', nek re xa' ndyabla's, nek re xa' guy, nek re xa' nke'de xis men, nde nekla re xa' nkib chan' men kon yalkwin', reta xa' re' na'yoted xa' ten' nyebe' Dios.

¹¹ Reta jwan' re' nak pla go' nera', per naya mbila go', nakla go' men nayon, nakla go' men gal' lo le Jesrist Xa' Nyebe' nde kon Xbin Xud na' Dios.

Pkenap lazo' go' lo jwan' nchola's bel' go'

¹² “Reta jwan' toyal lin” per na'rede li sin';* reta jwan' toyal lin, per nek thiba na'tat na di's liy gan lon.

* 6:12 6:12 1 Co. 10:23.

¹³ Le' re jwan' ncha men nday len' men, nde len' men nda re jwan' ncha men nde re jwan'na Dios li luxa. Per bel' men na'nakte par li men re jwan' xkap, che'la bel' men naka par Xa' Nyebe', nde Xa' Nyebe' nak Xa' par bel' men.

¹⁴ Nde Dios jwan' mblo'xban Jesucrist, taga' ko'xban Dios na' kon yalne chan' Xa'.

¹⁵ ¿Cho na'nyed go' dib ben go' ntenta re lad Crist? ¿Cho toyal kib na thible lad Crist sa tentaney lad ti ngol ntho lad na'? Na'nyeday.

¹⁶ ¿Cho na'nyed go', xa' ncha'xno ngol ntho lad na' thita bel' nak rop xa'? Tak lo xki's Dios nchab: "rop xa' thita bel' ak xa'."†

¹⁷ Le' men jwan' thita nak kon Xa' Nyebe', thita xbi nak rop xa'.

¹⁸ Jwan' nasa, bxon' go' lo jwan' ndyabla's bel' go' gaxno go' ti men. Tak choja tedib yalke jwan' ndli men, na'ntotide bel' men; le' jwan' ta ndyabla's bel' men gaxno men tedib men, le'ga lo bel' xa' nkwan' xa' yalke.

¹⁹ ¿Cho na'nyed go' le' bel' go' nak yodo' chan' Mbi Nayon jwan' mda' Dios lo go', nde Mbi Nayon nzoy lazo' go',‡ nde na'go'da nak xwan' bel' go'?

²⁰ Tak nayax toz mdyu' go', jwan' nasa, bli naro toz go' Dios kon bel' go' nde xbin go', tak ropa nak chan' Dios.

7

Xa ndablo tyobno men sal' men

† 6:16 6:16 Gn. 2:24. ‡ 6:19 6:19 1 Co. 3:16; 2 Co. 6:16.

¹ Naya kab na lo jwan' ta nya'bdi's go' lon ta mke' go' lo ye's. Wen naka lo mbi' na'tyenta xa' ngol;

² per xke nchaxno xa' tedib men jwan' na'nakta sal' xa', jwan' nasa mas jwin kad mbi' tyobno mbi' ngol ak sal' mbi', nde kad ngol tyobno ngol mbi' ak sal' ngol.

³ Le' mbi' ndablo toyal xa' lo ngol nak sal' xa', nde taga' ngol ndablo toyal ngol lo sal' ngol.

⁴ Tak na'nyebe'tra ngol lo bel' ngol che'la sal' ngol nyebe'y, nekla xa' bi', na'nyebe'tra xa' lo bel' xa' che'la men got xa' nyebe'y.

⁵ Na'kala'sta go' lo sal' go', mbay tez rop ta go' akdi's na'galta go' ta go' lud tyemp, toyal, sa le' go' keno tyemp todi'sno go' Dios, ngolo jwan'na toyal gal go' ta go' tedib gob, sa na'kanta maxu' xgab go' tak yoloa na'akta kenap lazo' go', .

⁶ Jwan' re' nak ti di's gol nin lo go', na'nakte ti yalnyebe'.

⁷ Ndryo' lazo'n tezka re go' ak xa nak na re', per kad thiba men mda' Dios lo men jwan' toyal li men, nzo men nak ti mod nde nzo men nak tedib mod.

⁸ Jwan' nasa, mbez na lo re go' men thib nde re go' ta nguj sal' na', jwin toz naka tez yan' go' ta xa ndo na re'.

⁹ Per tez na'lid go' gan kenap lazo' go', nakin' pselya' go', tak mas jwin pselya' go' kega liy gan lo go'.

¹⁰ Le' re go' ta mselya'ba, na'nakta na nyebe' jwan' re', Jesucrist nyebe'y: Le' ngol na'la'd ngol sal' ngol,

¹¹ mbay tez la' ngol sal' ngol, na'ndabloda selya' ngol kon tedib mbi', mas jwin toyal ngol kwent kon sal' ngol, nde taga' xa' bi' na'ndabloda la' xa' ngol xa'.*

¹² Le' lo masra' go', nin jwan' re' lo go' nde na'nakte Xa' Nyebe': Tez nzo ti wes ndobno ti ngol na'ndlid lazon' Dios, nde ngol ya nale nzo lazo' ngol ndobno ngol xa', nakin' na'la'd xa' ngol.

¹³ Mbay tez ti ngol jwan' ndli lazon' Dios nde ndobno ngol ti mbi' na'ndlid lazon' Dios, per tez mbi' ya nale nzo lazo' xa' ndobno xa' ngol, nakin' na'la'd ngol xa'.

¹⁴ Tak mbli nayon Dios mbi' ta na'ndlid lazon' Dios, lo mka mbi' ngol ta ndli lazon' Dios; nde taga' mbli nayon Dios ngol ta na'ndlid lazon' Dios, lo mka ngol mbi' ta ndli lazon' Dios. Tez na'tada naka, le' re or bix jwan' nak xin' xa' pa ak nambir lo Dios, per naya nayon nak or lo Dios.

¹⁵ Per tez xa' ta na'nakta xin' Dios nchola's xa' la' xa' sal' xa', toyal li xa'y, tak xa' jwan' nak xin' Dios na'nagod xa' lo ya' men ya, che'la mbrez Dios na' sa nabe'z ban na'.

¹⁶ Tak lu ngol ¿Xa mnea cho tlia gan lya' xa' bin' la? Taga' lu xa' bi' ¿Xa mnea cho tlia gan lya' xa' got la?

¹⁷ Kad thiba men ndablo ban men jwan' xa mda' Dios lo men, jwan' xa nak men sen' lo mbrez Dios men, jwan' re' nyebe'n lo reta yodo'.

¹⁸ ¿Cho nzo xanya go' mdobla be' lad na' sen' lo mbrez Dios go'? tata byan' go'. ¿Cho nzo xanya

* **7:11 7:11** Mt. 5:32; 19:9; Mr. 10:11-12; Lc. 16:18.

go' tera' tyob be' lad na' sen' lo mbrez Dios go'?
Bla' go' na'tobta go'y.

¹⁹ Tak na'ntakta jwan' ta tyob be' lad men bi'ba
o na'tyobtay, jwan' mas ntak nak xobyek men
yalnyebe' chan' Dios.

²⁰ Kad thiba go' tata byan' go' jwan' xata nak go'
lo sen' mbrez Dios go'.

²¹ ¿Cho nak la mos sen' lo mbrez Dios la? na'lid
la xgab; per tezka tia gan lya'a na'aktrala mos,
masra' pchala.

²² Tak xa' jwan' nak mos lo mbrez Xa' Nyebe'
xa', Xa' Nyebe' mbli mblya' xa', nde taga' xa' jwan'
na'nakta mos lo mbrez Crist xa', lo Crist ak xa'
mos.

²³ Nap toz mxi' Dios go', na'aktra' go' mos lo re
men.

²⁴ Kad thiba go', wes na, ptan na, xata nak go'
lo mbrez Dios go', tata thibla' pto go' lo Dios.

²⁵ Le' re mdyen' yen' ta tera' selya', na'ngenot
na yalnyebe' chan' Dios jwan' tej na lor, per tej na
jwan' nak xgab na, nde toyal li lazo'r jwan' todi's
na, tak Xa' Nyebe' mblat lazo' Xa' na.

²⁶ Na ndyak mas jwin tata tyo thib men, tak ne
nak tyemp ta nzin' naya.

²⁷ Per tez mkaa la ngol, nala'd la xa'. Nde tez
terka kaa ngol, na'kad la xa'.

²⁸ Mbay tez selya'a, na'nakta jwan'na yalke.
Nde tez ti mza' yen' selya' mza', taga' na'nakte
yalke. Jwan' ndliy nak, re men ta mselya'a ba
ndri'd xa' yalti, nde jwan'na na'ncholasta na rid
go'.

²⁹ Wes na, ptan na, ncholas na nin lo go'; tudla
tyemp nda'b. Jwan' nasa, re go' men bi' ta ndobno

men got, nakin' li go' xaga men na'ngenta ngol na',

³⁰ le' go' ta nchon' bli go' xaga men na'nchon'ta, le' go' ta nale nzo lazon' bli go' xaga men na'naled nzo lazon', le' go' ta ndi' jwan', bli go' xaga men ngen kwan mxi',

³¹ nde re go' ta nchoxil lazon' lo re jwan' lo izyo re', bli go' xaga men na'nchoxilta lazon'. Tak izyo ta ngwin' re' mer luxa.

³² Na'ncholasta na rid go' xgab. Tak ti men bi' thib, ben'ta re jwan' chan' Dios ndli men xgab nyen' xomod konale men lazo' Xa' Nyebe',

³³ per men ndobno ngol ben'ta re jwan' lo izyo ndli xa' xgab, sa nyen' xomod konale xa' lazo' ngol xa'.

³⁴ Taga' nzye' naka kon ngol ndobno sal' na' nde ti mza' yen'. Le' mza' yen' ndli xgab re jwan' nak chan' Dios, sa nayon ban mza' nde nayon ak xgab mza' lo Dios. Le' ngol ndobno sal' na', ben'ta re jwan' lo izyo ndli ngol xgab, nyen' xomod konale ngol lazo' sal' ngol.

³⁵ Ndej na jwan' re' lo go', tak le'y li wen lo go', na'nakte jwan' ngetow na lo go', che'la ndej nay sa naxu'ta ak go' nde naxu'ta kete go', sa ngen kwan tow' lo bike go' gax lo Xa' Nyebe'.

³⁶ Tez nzo xa' ndli xgab mas jwin selya' mza' xin' xa' tak ndori'd lin' or, tli gana, tez ta ndli xa' xgab, toyal selya'r, na'nakta jwan'na yalke.

³⁷ Per tez nzo xa' ndli wen xgab len' lazon', na'nakin'ta selya' mza' xin' xa', tak toyal kenap lazo'r, nde tli xa' gan kenap xa' or, wen ndli xa'.

³⁸ Jwan' nasa, xa' jwan' ntoselya' mza' xin' na' wen ndli xa', nde xa' jwan' na'toselya'd mza' xin' na' wen toz ndli xa'.

³⁹ Le' ngol ta ndobno sal' na', nakin' tyobno ngol sal' ngol laj naban xa' bi', per tez nguj xa' bi', toyal selya'no ngol tedib mbi' jwan' ndyen ngol, per nakin' aka kon ti mbi' jwan' ndli lazon' Xa' Nyebe'.

⁴⁰ Nde ndyak na, mas nabe'z yo ngol tez na'kad ngol tedib mbi'. Jwan'na nak xgab na nde ndyak na non ngeno Xbi chan' Dios.

8

Ma' nguj xa' lo mnab

¹ Mbay naya kab na lo jwan' ta nya'bdi's go' lon kwent chan' ma' ta nchuj xa' lo mnab. Liga reta na' mnea na' ke nzolon' jwan' re'; per lo ta jwin nzolo men, jwan'na ndli nchak naro men, nde le' yalke'lazo' ndli nxien men lo xned Crist.

² Tez nzo ti xa' ndli xgab jwan' toz nzolo xa', gal' di's tera' yolo jwin xa' xa nakpa'y.

³ Tez nzo men nke' lazon' Dios, nzoloa Dios men ya.

⁴ Per nin lo go', le' jwan' ta wa men bel' ma' ta mta'b xa' lo mnab, mnen' le' ti mnab ngen kwan naka lo izyo re', tak ben' thipta Dios nzo.

⁵ Tenyega nzo bro toz jwan' mbez men nak dios, le'y lo be' nde le'y lo izyo, retay nak dios nde retay nak xa' nyebe',

⁶ per na', mnen' ben'ta thipta Dios nzo, Dios ya nak Xud na', Xa' mdoxkwa' reta jwan' nde naban na' par Xa'. Nde taga' nzo thipta Xa' Nyebe', Xa' ya nak Jesucrist, por Xa' sa nzi reta jwan' nde por Xa' sa nzi reta na'.

⁷ Per na'reda men ta ndli lazo'n xki's Dios mne jwan' re'. Tak nzo men mbyen xa' nxo'byek xa' re mnab sa tatka ncha xa' jwan' xajka ma' ta nchuj

xa' mbe lo mnab nde lo ta ndli xa' jwan'na, zyasa nda'y xgab yek xa', jwan'na ndli nchak bew xa'.

⁸ Na'nakta jwan' ncha men li sa yan' wen men lo Dios; tak te'nyega wa mena na'akta men xa' ntak lo Dios o te'nyega na'wad mena na'akta men xa' na'ntakta lo Dios.

⁹ Ndawi' toz go', tak lo ta toyal wa go' re jwan', jwan'na li sa cheb re xa' ta nale' ndo lo xki's Dios.

¹⁰ Mbay tez lu mnea jwan' ndlia nde ndob yaa bel' ma' jwan' nchuj xa' mblek xa' lo mnab, nde zin ti xa' nale' ndo lo xki's Dios, wi' xa' lu ndob yaa tya ¿Cho na'noda men ya tla xgab yek xa' toyal wa xa' ma' jwan' nchuj xa' mbe lo mnab?

¹¹ Nde lo ta mnea jwan' ndlia, jwan'na li sa tya'b wes la ta nale' ndo lo xki's Dios nde Crist nguj por xa'.

¹² Jwan' re' ndli go' sa ndlya xgab narax yek xa' ta nale' ndo lo xki's Dios nde jwan'na ndli nkwan' go' xken go' lo Crist.

¹³ Jwan' nasa, tezka jwan' nchan ndli sa gab ti wes na lo yalke, mas jwin na'watra na bel' ma' ta nchuj xa' mbek xa' lo mnab, sa na'gabta wes na lo yalke por xken na.

9

Jwan' nzal' ti xa' nak apóst

¹ ¿Cho na'nakta na apóst? ¿Cho na'akta lin jwan' ncholas na? ¿Cho tera' wi'n Jesús Xa' Nyebe'? ¿Cho na'nakta go' nak sin' mbilin lo Xa' Nyebe'?

² Tez nzo men ndli xgab na'nakta na apóst, per lo go' liga nak na apóst, tak lo ta ndli lazo' go' Jesucrist, jwan'na ngobe' na, liga nak na apóst.

³ Che'mod ndla lazo'n lo re men ngoxyo rsin na.

⁴ ¿Cho nanot ná' toyal wa ná' nde gu ná'?

⁵ ¿Cho na'akta we ná' ti men got ndli lazon' Dios ak sal' ná', ta xa ngete masra' re xa' nak apóst, xa ngete re xa' nak wes Jesús Xa' Nyebe' nde ta xa ngete Pedr?

⁶ ¿Cho ben'ta na nde Bernabé ndablo ke ná' xa'ga sin' sa sena' ná' jwan' wa ná'?

⁷ ¿Cho nzo ti sondad le' ngix xa' jwan' ncha xa'? ¿Cho nzo ti xa' ngo bin lus ub nde na'nchad xa' ngud nge lo ne'y? o ¿Cho nzo men nkenap mbak xil' nde na'nchu'd xa' nis jwan' ngo' xa' xis ma'?

⁸ ¿Cho ben'ta na ndobez jwan' re' sa? ¿Cho na'tada ngeniy lo ley chan' Moisés?

⁹ Tak lo ley chan' Moisés ngeni: "Na'kod go' yex ro ngon sen' ngeyis ma' trig."* ¿Cho ndyak go' ben'ta ngon ndli Dios xgab,

¹⁰ o na' ndeja lo ta nchaba? Loga na' ngeniy, tak xa' jwan' ndle yogon, nde xa' jwan' ngis trig, ndli xa' sin' tak le' xa' ngembed kaya' xa' jwan' ngok.

¹¹ Tez ná' mblobin xki's Dios lazo' go' ¿Cho jwan' toza ndyak go' tez ta' go' lud jwan' nakin' ná'?†

¹² Tez xa'la xa' ntoyal nkaya' jwan' nda' go', ¿Cho le'ta ná' sa?

Per terka li ná' jwan' re' kon go', che'la nxek ná' lo reta jwan', sa na'tow'ta ná' lo di's wen chan' Jesucrist.

¹³ ¿Cho na'mned go', men ta ndli sin' lo jwan' yon, jwan' yona ncha xa', nde re xa' jwan' ndli sin' len' yodo' ten' nchuj xa' ma' yon lo Dios, bel' ma' ya ncha xa'?‡

* 9:9 9:9 Dt. 25:4. † 9:11 9:11 Ro. 15:27. ‡ 9:13 9:13 Dt. 18:1.

¹⁴ Taga' mod nyebe' Xa' Nyebe', le' re men jwan' ngetetej di's wen chan' Jesucrist, lo sin' ya ryo' jwan' wa xa'.§

¹⁵ Le' na, na'mblirsinta na jwan' re', nekla ngeke'n jwan' re' lo go' sa ta' go' jwan' lon. Tak mas jwin gaj na tezka cho kib yalnale ta nzo lazo'n re'.

¹⁶ Tak lo ta ndej na di's wen chan' Jesucrist, na'nakte jwan' nxyal' na, che'la naka jwan' ndablo li ney. ¡Nalát nyan tez na'tejta na di's wen chan' Jesucrist!

¹⁷ Jwan' nasa, tez dib nzo lazo'n ndli ney, kayan jwan' nzal' na; nde tez na'ndlit nay dib nzo lazo'n, ndabloga li ney tak naka jwan' mnabe'a Xa' lon.

¹⁸ ¿Cho kwan lin gan lo jwan' re'? Jwan' lin gan nak, tata ndej na di's wen chan' Jesucrist lo re men, na'ngembeta na kix xa' kan lo ndej na di's wen chan' Jesucrist.

¹⁹ Tenye na'nakta na mos lo nek thib men, per ndon xajka mos sa lin gan masra' men par Crist.

²⁰ Sen' nzon xij re xa' judí ndlin xa ndli re xa' judí, sa lin gan li lazo' xa' Crist, nde sen' ndon kon re xa' nxo'byek ley chan' Moisés taga' nxo'byek na ley, tenyega na'nakin'ta xobyek nay, per ndli ne sa tamod lin gan re xa' ta nxobyek ley.

²¹ Sen' nzon xij re xa' na'nxobyekta ley, ndlin xaga men na'nxobyekta ley, sa lin gan re xa' ya, te'nyega na, thibla' ndonoy ley chan' Dios nde nxo'byek na ley chan' Crist.

²² Sen' nzon xij re xa' nale' ndo, taga' nale' ndyon, tamod sa lin gan re xa' ya par Crist. Re

§ 9:14 9:14 Mt. 10:10; Lc. 10:7.

lo ned jwan' ndyak men, re lo ned jwan'na ndlin, sa tamod lin gan lya' pla xa'.

²³ Ndlin jwan' re' por kwent chan' di's wen chan' Jesucrist, sa non gal yalwen jwan' ndenoy.

²⁴ ¿Cho na'nyed go' re xa' ta nke' karela, thita ndryo' reta xa' karel, per thibta xa' jwan' ndli gan? Taga' bli go' xa men nke' karela sa li go' gan.

²⁵ Reta xa' ta nchola's li gan ti jwan', ngenap toz lazo' xa' lo re ned jwan', sa li xa' gan ti koron ta ndluxa. Le' na', ken' karel sa lin' gan ti koron na'ndluxta.

²⁶ Jwan' nasa, na'nke'kowta na karel, nde na'gyot na xa ngyo re xa' nke'y lo mbiba.

²⁷ Che'la ndan goba, nchal na sa mbek lazo'n, tak ndaga mas mtote'd na re men nde le' na mbyan'ken.

10

Mbez Pab yek re men ta ndli lazon' mnab

¹ Wes na, ptan na, na'ncholasta na yaj yek go' jwan' mbri'd re xa' gox lon' ngo pola, sen' ngo reta xa' xan' xkow* nde reta xa' mbri'd len' nitto'.†

² Reta xa' mbro'le len' xkow nde len' nitto' sa thita ngok xa' kon Moisés.

³ Thibneta jwan' mda' Dios mda reta xa'.‡

⁴ Nde thibneta nit mda' Dios ngu' reta xa'.§ Tak le' xa' ngu' nit ndryo' lad ke jwan' mda' Dios, ke ta mketenke xis xa' nde ke ya nak Crist.

* **10:1 10:1** Ex. 13:21-22. † **10:1 10:1** Ex. 14:22-29. ‡ **10:3 10:3** Ex. 16:35. § **10:4 10:4** Ex. 17:6; Nm. 20:11.

⁵ Nde tenyega reta jwan'na mbli Dios por xa', bro toz xa' na'mblida jwan' ndryo' lazo' Dios, jwan' nasa nguj xa' nde mbyan' xa' izyo biz.*

⁶ Reta jwan' re' ngok sa te'd na', na'tyabla'sta na' jwan' narax, ta xa mbli re xa' gox lon' ta mbre pola.†

⁷ Nekla xobyek go' re mnab, ta xa mbli pla re xa' gox lon' ta ngo pola, nde xa nchabka lo xki's Dios: "Reta men mdob mda, ngu' xa' nit, nde mbli xa' ni."‡

⁸ Nekla lin' re jwan' bew kon men na'nakta sal' na', jwan' xa mbli pla xa' gox lon' ta ngo pola, nde len' ti wizta nguj gal bson mil xa'.§

⁹ Nekla liben' Crist, jwan' xa mbli pla xa' gox lon' ta ngo pola nde nguj xa' tak mke' mbel'la cho xa'.*

¹⁰ Nekla ni narax go' xis Dios jwan' xa mbli pla xa' gox lon' ta ngo pola, mni xa' xis Dios nde mbye'd áng chan' yalguj, mbij áng xa'.†

¹¹ Reta jwan' re' mbri'd re xa' gox lon' ngo pola, nde ngey lo ye's sa mbeza yek reta na' ta nzi lult tyemp re'.

¹² Jwan' nasa, men jwan' ndli xgab gal' ndo, ndawi' toz xa' na'gab xa'.

¹³ Re prueb ta ndori'd go', retka men ndri'da. Per gal' nak Dios na'ta'd Xa' di's tokil' jwan' narax go', re jwan' na'xekta go'. Che'la sen' lo ntokil' jwan' narax go', Dios la'sto go' sa ryo'te go' lo jwan'na, nde tamod li go' gan xek go'.

* **10:5 10:5** Nm. 14:29-30. † **10:6 10:6** Nm. 114. ‡ **10:7 10:7** Ex. 32:6. § **10:8 10:8** Nm. 25:1-18. * **10:9 10:9** Nm. 21:5-6. † **10:10 10:10** Nm. 16:41-49.

¹⁴ Jwan' nasa, wes na, ptan na, nke' lazo'n go', bxon' go' lo re jwan' chan' mnaba.

¹⁵ Todi'snon go' xajka men nchena, sa toyal yen' go' jwan' ndej na.

¹⁶ Lo sen' nchun' kop chan' yalwen nde ndan' dyux lo Dios, ¿Cho najwan'nada ndli sa thita nak na' lo ren chan' Crist? Nde lo sen' nchan' pan jwan' ndlirol na', ¿Cho najwan'nada ndli sa thita nak na' lo bel' Crist?‡

¹⁷ Nde te'nyega brotoz na', thita pan ncha reta na' sa jwan'na ndli thita nak na'.

¹⁸ Bwi' go' xa' Israel, sen' ncha xa' bel' ma' yon, thita nak xa' kon ten' nayon jwan' ta nchuj xa' ma'.§

¹⁹ ¿Cho kwan nak jwan' ta ncholas na tej na lo go' re'? na'nit na lo go' ke re mnaba ntaka, nekla ntak re bel' ma' yon ta nchuj xa' ndaya' xa' lo mnab.

²⁰ Jwan' nin lo go' nak, re xa' ta na'nzolod Dios, lo sen' nchuj xa' ma' jwan' mbek xa' lo re mnab, na'ngelid xa'y lo Dios le' xa' ngeliy lo re mbi narax,* nde nanchola'sta na thita ak go' kon re mbi narax.

²¹ Na'nyed gu go' kop chan' Xa' Nyebe', nde kop chan' re mbi narax; na'nyeda wa go' jwan' nzo lo mes chan' Xa' Nyebe' nde wa go' jwan' nzo lo mes chan' re mbi narax.

²² ¿Cho nchola's na' lin' sa ak no lazo' Xa' Nyebe'?† ¿Cho ndyak go' mas nen' ke Xa'?

Li men reta jwan' sa li naro men Dios

‡ **10:16 10:16** Mt. 26:26-28; Mr. 14:22-24; Lc. 22:19-20. § **10:18**

10:18 Lv. 7:6. * **10:20 10:20** Dt. 32:17. † **10:22 10:22** Dt. 32:21.

²³ Reta jwan' toyal lin, per na'rede li sin',[‡] nde liga retay toyal lin per na'rede li xyen na lo xki's Dios.

²⁴ Na'ndabloda kwan' men yalwen ben' par le'ga men, ndablo kwan' mena par masra' xa'.

²⁵ Reta bel' ta ntho xa', toyal wa go'y, nde na'nyabdi'sta go' plo ndey sa na'lyad xgab narax yek go';

²⁶ tak chan' Xa' Nyebe' nak dib nax izyo nde chan' Xa' nak reta jwan' nzi lo izyo. §

²⁷ Tez ti xa' na'nzoloda Dios, kwez xa' go' lo yalwa, wa go' tez nchola's go' ya go', bda go' reta jwan' kwek xa' lo go', nde na'nyabdi'sta go' plo ndey sa na'lyad xgab narax yek go'.

²⁸ Nde tez nzo xa' nye lo go': "Bel' ma' mbij xa' mbre lo mnab jwan' re'" na'wad go'y, tak mdejla xa' xomod naka, nde mne go' xgab jwan' ndono xa'. Tak chan' Xa' Nyebe' nak dib nax izyo nde chan' Xa' nak reta jwan' nzi lo izyo.

²⁹ Na ndotej xgab tedib xa' ya, na'nit na, go' ndli xgab ya.

Nzo go' nye lon: "¿Cho kwan liy sa xgab tedib xa' ya li sa na'toyalta wan jwan' ta' xa'?"

³⁰ Nde tez ndan dyux lo Dios lo re jwan' nchan ¿Cho kwan liy koxyo xa' na lo wa ney?"

³¹ Jwan' nasa, tez wa go' cho jwan' o gu go' cho nit o choja tedib jwan' li go', bli go'y sa li naro go' Dios.

³² Na'akta lu jwan' cheb re xa' judí, re xa' na'nakta judí nde re xa' yodo' chan' Dios.

[‡] 10:23 10:23 1 Co. 6:12. § 10:26 10:26 Sal. 24:1.

³³ Ta xa na re', nchal na ngo nalen lazo' re men lo reta jwan', na'nkwanta na ben' jwan' li wen lon, le'n nkwan yalwen chan' masra' men, sa lya' men.

11

¹ Bli go' jwan' ndlin,* ta xa ndlin jwan' ndli Crist.

Xomod ndablo tyo ngol

² Nabe'z toz nin xis go' wes na nde ptan na, tak thibla' nte'la's go' na nde thibla' ndenke' go' re jwan' mtote'd na go'.

³ Nde ncholas na nye go' jwan' re', Jesucrist nak yek lo men bi' nde men bi' nak yek lo men got nde Dios nak yek lo Crist.

⁴ Tez nzo men bi' now' yek xa' lo ndyodi'sno xa' Dios o now' yek xa' lo ndej xa' lo re men jwan' mni Dios lo xa', ngo' yantho xa' Xa' nak yek lo xa'.

⁵ Taga' ngol, tez ndoxal' yek ngol lo ndyodi'sno ngol Dios o ndoxal' yek ngol lo ndej ngol lo re men jwan' mni Dios lo ngol, ngo' yantho ngol xa' nak yek lo ngol, lal naka xa ti ngol mchub yek na'.

⁶ Tak tez na'tow'ta ngol yek ngol, nakin' cho' yisyek ngol, per tez yantho nya ngol lo cho' yisyek ngol o thipta ne chub yek ngol, mas jwin yow' yek ngol.

⁷ Le' xa' bi' na'ndabloda yow' yek xa', tak xa' bi' nak jwan' xa nak Dios nde ndlo' xa' yalnaro chan' Dios† per le' ngol ndlo' yalnaro chan' xa' bi'.

⁸ Tak na'mblo'd Dios mbi' ner lad ngol ner, che'la lad mbi' mblo' Dios ngol.

* **11:1 11:1** 1 Co. 4:16; Fil. 3:17. † **11:7 11:7** Gn. 1:26.

⁹ Nde na'nakta por ngol sa mdoxkwa' Dios mbi', che'la por mbi' sa mdoxkwa' Dios ngol.‡

¹⁰ Jwan' nasa, ndablo yow' yek ngol, sa tamod lo' ngol lo re anj ke nzo xa' nak yek lo ngol.

¹¹ Mbay le' re na' ta ndli lazon' Jesucrist, le' men bi' ndeche xa' ngol nde ngol ndeche xa' men bi'.

¹² Tak ta, xa lad mbi' mblo'si'b Dios ngol, taga' lo ngol nchal men bi' nde reta jwan' re' por Dios ndryo'si'ba.

¹³ Le'ga go' bli xgab jwan' re': ¿Cho gal' naka na'yow'ta yek ngol sen' ndyodi'sno ngol Dios?

¹⁴ Nde taga', le'ga re men mne, yantho nya xa' bi' tez ta' xa' di's xyen yisyek xa'.

¹⁵ Mbay le' re ngol, che'la nzal' ngol nol' yisyek ngol, nde yisyek ngol nak lar jwan' xyo'b yek ngol.

¹⁶ Nde tez nzo xa' tatka nchola's yodi's jwan' re', le' ná' na'nakta ná' tamod, nde nekla re yodo' chan' Dios.

Ndridnda'b ncha xa' rsye' chan Xa' Nyebe'

¹⁷ Re jwan' ta nara' ke'n lo go' re', na'naled nzo lazo'n tej na re jwan' ndli go', tak sen' ndyopbe go' na'nakte jwan' ndli wen lo go', che'la mas bro jwan' narax ndliy lo go'.

¹⁸ Jwan' ner tej na nak, sen' ndyopbe go' xaga men yodo' ba, nchon na mbez men, ke nchak rol go', nde mer liy ndyak na.

¹⁹ Tak nakin'ka yo jwan' re' xij go' jwan' ta ak rol go', sa yobe' nyen' xanya go' ne ndo lo xki's Dios.

²⁰ Sen' ndyopbe go', gal' di's na'ndyoped go' par wa go' rzye' chan' Xa' Nyebe'.

‡ 11:9 11:9 Gn. 2:18-23.

21 Tak sen' wa go'y, nzo go' nken nerla sa ncha go' jwan' ndeno go', laja tipla xa' tata ndyan', nde tipla xa' nke' yalguy.

22 ¿Cho ngenta liz go plo wa go' nde gu go'? ¿Cho ngo'tal go' yodo' chan' Dios, nde ngo'yantho go' men jwan' ngen kwan ngeno? ¿Cho kwanra' nin lo go'? ¿Cho ndyak go' nale nzo lazo'n ta ndli go'? ¡Na'naletirta nzo lazo'n!

Jwan' re' nakpa rzye' Nayon chan' Xa' Nyebe'

23 Jwan' re' mkayan mblo' Xa' Nyebe' lon nde jwan' naga ndlo'n lo go': Tak yal' jwan' ta mdaya' men Jesús Xa' Nyebe' sa gaj Xa', yal' ya mxen Jesús Pan,

24 nde sen' ngolo mda' Xa' dyux lo Dios, mbli rol Jesús pan nde nchab Xa': "Bxen go' pan re' nde bda go'y, jwan' re' nak bel' na, jwan' tayan por go', bli go' jwan' re' sa te'la's go' na."

25 Sen' ngolo mda rzye' xa', taga' mxen Jesús kop nde nchab Jesús: "Kop re'§ nak jwan' mda' nakub Dios xki's Xa' lo go' nde kon ren na mbli di'sa,* reta gob sen' gu go' jwan' re', bli go'y sa te'la's go' na."

26 Jwan' nasa, reta sen' wa go' pan re' nde sen' gu go' kop re', ndotej go' nguj Xa' Nyebe' axta sen' ye'd Xa'.

Mod ndablo wa men Rzye' Nayon chan' Xa' Nyebe'

27 Jwan' nasa, tez nzo men wa pan re' nde gu xa' kop re' kon ti mod na'gal'ta nak, xa' ya nkwan' xken na' lo bel' nde lo ren chan' Xa' Nyebe'.

§ 11:25 11:25 Ex. 24:6-8. * 11:25 11:25 Jer. 31:31-34.

²⁸ Jwan' nasa, sen' lo tera' wa go' pan nde lo tera' gu go' kop, nakin' kad thiba go' bla's go' xa ndo go'.

²⁹ Tak xa' jwan' ncha pan nde nchu' xa' kop kon ti mod na'galta' nak, nekla nye xa' cho bel' Xa' Nyebe' naka, xa' ya le'ga lo xa' nkwan' xa' yalke lo jwan' ta ncha xa' nde nchu' xa'.

³⁰ Jwan' nasa, na'r toz go' nayis nde nala nzo lazo' go' nde bro toz xa' ngujla.

³¹ Per tez kad thiba na' la's na' xa ndon', pa nya'bke Dios kwent lon'.

³² Sen' nya'bke Dios kwent lon', toxut Xa' na', sa na'nod na' yo xij re men ta kix xken' na' re xa' ta na'ndlid lazon' Jesucrist.

³³ Jwan' nasa, wes na, ptan na, sen' lo ndyopbe go' wa go', nakin' kwed go' kebe' keta reta go'.

³⁴ Tez nzo go' ndyan', ax bda go' liz go', sa tamod na'yeta yalnayi chan' Dios xis go' lo ta ndyopbe go'. Le' masra' re jwan', ba toxut nay lo sen' yatwi'n go'.

12

Jwan' nda' Mbi Nayon

¹ Wes na, ptan na, ncholas na jwin yen go' xa nak re jwan' ta ndala's Mbi Nayon.

² Pte'la's go' lo sen' tera' li lazo' go' Jesucrist, ngeteta'b go' lo jwan' narax ndyonke go' xis re mnab ta na'ndyodi'sta.

³ Jwan' nasa, ncholas na nye go', ke nek thib men ta ndono Mbi Nayon, na'nke'deda xa' xis Jesús, nde taga' nek thib xa' ta na'ndonoda Mbi Nayon na'toyalta gab xa' ke Jesús nak Xa' Nyebe'.

⁴ Naya, nzo na'r ned jwan' nda' Dios toyal li men, per thibta Mbi Nayon jwan' nda'y.

⁵ Nde nzo na'r ned sin' li men lo Dios, per thibta Xa' Nyebe' nzo.

⁶ Nde xaxa' mod ndli Dios re jwan', per thipta Xa' ndli sa li mena.

⁷ Nde thiba lo men ndlo' Dios jwan' nda' Mbi Nayon, sa thita la'sto men ta men.

⁸ Tak nzo lo men nda' Mbi Nayon sa nawe nzo xgab yek xa' lo ndyodi's xa', nde nzo lo men nda' Mbi Nayon yalnchak sa nchen xa' reta jwan'.

⁹ Nzo lo men nda' Mbi Nayon sa ndlipa lazo' xa' Dios, nde nzo lo men nda' Mbi Nayon jwan' ntoyak xa' men nayis.

¹⁰ Nzo xa' nkaya' sa li xa' jwan' nzoyen men, tedib xa' nakaya' jwan' ni Dios lo xa' sa tej xa'y lo men, nzo xa' nkaya' sa ndlibe' xa' re xbi , nzo xa' nkaya' sa ni xa' na'r lo di's na'yenta men nde nzo xa' nkaya' sa ngo'xkan xa' re di's ya.

¹¹ Nde reta jwan' re' ben'ta thibta Mbi Nayon ndliy, ngi'd Mbi Nayona lo kad thiba men axa nchola's Mbi Nayon.*

¹² Tak xa nak ti men, na'r toz jwan' naksa' men; nde reta jwan' ta naksa' men, tenye na'r toza, thipta men naka, taxa mod nak Crist.†

¹³ Tak por thipta Mbi Nayon mbro'le reta na' sa ngok na' thita bel', te'nye nak na' men judí o men na'nakta judi, men nak moz o men na'nakta moz, nde thita Mbi Nayon nyebe' lazo' reta na'.

¹⁴ Xa ti mena, na'nakta thipta jwan' nak sa' men, che'la na'r lo jwan' naksa' men.

* 12:11 12:11 Ro. 12:6-8. † 12:12 12:12 Ro. 12:4-5.

¹⁵ Tez ní mena nye: “Lo ta na'nakta na ya', na'ngendenta na lad men”, ¿Cho jwan'na ndli sa na'ngendente lad bel' men?

¹⁶ Nde tez nza men nye: “Lo ta na'nakta na ngudlo, na'ngendenta na lad men”, ¿Cho jwan'na ndli sa na'ngendente lad bel' men?

¹⁷ Tez dib ben men naksa' ngudlo ¿plo tyob nza men sa? O tez dib ben men naksa' nza, ¿Plo tyob xi men sa?

¹⁸ Per Dios mdobsa' kad thiba jwan' naksa' men plo ten' nchola's Xa' tyoba.

¹⁹ Tak tez thipta jwan' naksa' dib men, ¿Plo mbyan' dib ben men sa?

²⁰ Te'nyega na'r toz re jwan' naksa' men, per thipta nak dib ben men.

²¹ Le' ngudlo men na'nyeda kweza lo ya' men: “Na'naki'nta na lu”; nekla yek men na'nyeda kweza lo ní men: “Na'naki'nta na go'.

²² Nzo jwan' naksa' men ndyak men na'ntaktay, che'la jwan'na mas nakin'.”

²³ Nzo jwan' ndob lad men ndyak men na'ntaktozta, jwan'na mas ndogok xab men. Nde nzo jwan' ndob lad men ndyak men na'ndaktay, jwan'na mas ntak lo men,

²⁴ Tak re lad men ta mas ndogok xab men na'ndechede nekthib jwan', jwan' nasa Dios mtoxkwa' dib ben men, sa ndawi' men de kenap men jwan' lud ntak.

²⁵ sa na'ryo'xa'da re jwan' naksa' men, che'la kad thiba jwan' naksa' men ndawi'y ta ne'y.

²⁶ Tes ti jwan' ta ndob lad men nchow, noga dib ben men nchow; nde tez nabe'z nkenap men ti lad men, noga dib ben men nawe ndyak.

²⁷ Jwan' nasa, lo reta na' nak na' dib Crist, nde kad thiba na' nak na' thiba jwan' naksa' Crist.

²⁸ Jwan' nasa, re men jwan' nak yodo', Dios nda' xaxa' sin' li men, jwan' ner nak, re xa' nak apóst, xisa, re xa' nak profet, xisla re xa' jwan' ntote'd men,[‡] xisa re xa' ndli yalseye, zyara' re xa' jwan' ntodan' men, re xa' jwan' ndla'sto men, re xa' ndli sin' len' yodo' nde re xa' ta ni di's na'yenta men.

²⁹ ¿Cho reta xa' nak apóst sa? ¿Cho reta xa' nak profet? ¿Cho reta xa' nak xa' ntote'd men? ¿Cho reta xa' ndli yalseye?

³⁰ ¿Cho reta xa' toyal li sa dyan' men? ¿Cho reta xa' ni di's na'yenta men? ¿Cho reta xa' toyal koxkan re ned di's ya?

³¹ Jwan' nasa ptob lo go' kaya' go' jwan' mas li sin' xij go' ta nda' Dios. Le' na, naya lo' lo go' ti ned mas jwin.

13

Yalke'lazo'

¹ Tez ndyodi's na re ned di's jwan' nzo lo izyo nde re di's jwan' ndyodi's re ang, per na'ngenod na yalke'lazo', nak na xaja tible lam ben' nale ndyeza, o xa ti yi'b musk ta ngo biba.

² Nde tez nak na men ni Dios lon sa tej na xki's Xa' lo re men, nde mnen re jwan' naga's chan' Dios, nde ngeno toz na yalnchak, nde ndlipa lazo'n Dios, axta tlin sa bike re kox ten' naxa,* per tez na'ngenod na yalke'lazo', zyasa ngenkwan nak na.

[‡] 12:28 12:28 Ef. 4:11. * 13:2 13:2 Mt. 17:20; 21:21; Mr. 11:23.

³ Nde tez ki'd na re jwan' ngenon sa tan jwan' wa re men prob, nde tez ta'yan lazo'n xaja jwan' yona sa tol' xa' na, per na'nge'da lazo'n, ngencho sin' li jwan'na lon.

⁴ Le' yalke' lazo' nxeka lo reta jwan', nagu'sla's naka, le' yalke' lazo' na'nayi'd men nye men chan' ta men, le' yalke' lazo' na'nchaknarod men, na'nxyal'ta men.

⁵ Na'ndlide jwan' na'ndabloda, na'nkwa'nte ben' chan' ne'y, na'nayi'dey, na'ngosa'dey yala'sxí.

⁶ Na'nchonaled lazo' ne'y lo jwan' nagal'ta, che'la nchonale lazo' ne'y lo jwan' gal'.

⁷ Ndri'da lo reta yalti, lo reta jwan' ndli lazo' ne'y, lo reta jwan' ngembed, lo reta jwan' nxeka.

⁸ Le' yalke'lazo' na'ndluxtay; per re jwan' ta ni Dios lo men sa tej mena lo re men tluxloy, nde tata'b jwan' ta ni men xa'ga di's, nde tluxlo re yalnchak .

⁹ Tak nabe' jwan' nzolo men nde nabe' jwan' ni Dios lo men sa ndej mena lo re men.

¹⁰ Sen' ye'd jwan' gal', lux jwan' na'nakta gal'.

¹¹ Sen' ngok na or bix, mdodi's na xaga ti or bix, mblin xgab xaga ti or bix, mbloxyon xaga ti or bix, le' sen' ngol xgab na mblan re jwan' ta nak na xaja or bix.

¹² Le' naya naton' ngwin', xaja men ngwi' lon' ti lo spej ta na'ndlo'wenta ba, per yoloba gal' win' reta jwan', le' naya nabe'ta jwan' nzolon, per yoloba yolopa na xomod mbyolo Dios na.

¹³ Nde naya thibka nzo jwan' ndlipa lazo' men Dios, nkembed men Dios nde nke'lazo' men, le' lo re yon jwan' re'; jwan' mas naro nak, yalke'lazo'.

14

Todi's men xa'ga ned di's

¹ Ptonke go' xis yalke'lazo', nde pchal go' re jwan' nda'la's Mbi Nayon, per jwan' mas pchal go' nak ptej go' lo re men jwan' ni Dios lo go'.

² Tak xa' ta ni di's na'yenta men, na'nakta xa' ni lo re men, le' xa' ni lo Dios; nde ngen cho yen jwan' ndyodi's xa', tak Mbi Nayon ndli sa ndyodi's xa' re jwan' nzo naga's.

³ Mbay xa' ndej jwan' ne Dios lo xa', jwan'na ndli nxyen men lo xki's Dios, ntoxu'ta men nde ngo ney lazo' men.

⁴ Le' xa' jwan' ni di's na'yenta men le'ga xa' ndoxen, per xa' ndej jwan' ne Dios lo xa', jwan'na ndli nxyen re men yodo'.

⁵ Jwin toza tezka reta go' ni di's na'yenta men, per mas wen naka tej go' jwan' ne Dios, tak jwan' re' mas nakin' ke lo jwan' ta ni xa' di's na'yenta men, tez ngaka yo ti xa' ko'xkan di's ya zyasa tli sin'na sa xyen dib yodo' lo xki's Dios.

⁶ Le' naya, wes na, ptan na, tez na re', sin na lo go' nde todi's na di's na'yenta men, ¿Cho sin' li jwan'na lo go' sa? Mbay tez tej na lo go' ti jwan' mblo' Dios lon, tej na ti jwan' liga nak yalnchak, tej na jwan' mni Dios lon, o tej na ti jwan' ncholas na te'd go', jwan'na liga tli sin' lo go'.

⁷ Ta xa re yi'b ta nke' men diba, tez ti flaut nde ti biwel thita ndyesa, ¿Xomod takbe' men cho di ndryo'y?

⁸ Nde tez ti trompet ta'y xa'la bi, ¿Xomod tyosa' men sa ya men lo byo?

⁹ Taxa naka kon go', sen' ni go' di's na'yenta men, ¿Xomod yen men xki's go' sa? xaja men ndoni lo mbiba nak jwan'na.

¹⁰ Na'r toz ned di's nzo lo izyo re' nde retay tak ryo'xkan.

¹¹ Per tez nzo xa' ni lon nde na'yenta na xki's xa', zyasa ndoyak na men tedib lad lo xa' nde taga' men thiblad nak xa' ya lon.

¹² Jwan' nasa, re go' ta ndyen toz re jwan' nda'la's Mbi Nayon, pchal go' li go' gana sa masra' liy nxyen re men yodo'.

¹³ Jwan' nasa, tez cho go' ni di's na'yenta men, mna'b go' lo Dios sa toyal ko'xkan go' di's ya.

¹⁴ Tak tez na, todi'snon Dios kon di's na'yenta men, zyasa ben' xbin na jwan' ndyodi'sno Dios, le' na ngen kwan nchen na.

¹⁵ ¿Cho kwan lin sa? Todi'snon Dios kon xbin na, per noga nakin' todi'snon Dios kon di's jwan' nchen na. Gol na lo Dios kon di's nchol' xbin na, per noga nakin' gol na lo Dios kon di's nchen na.

¹⁶ Tak tez ben' kon xbin la li le'y la Dios, nde tya ndo ti xa' kub ndo yona, ¿Xomod gab xa', Ta aka, lo di's ta ndonia ya? Tak na'mbyenta xa' di's jwan' nchab la.

¹⁷ Tak liga nawe toz nda'a dyux lo Dios, per xa' jwan' nchona na'xyenta xa'.

¹⁸ Ndan dyux lo Dios tak na jwan' mas ndyodi's di's na'yenta men ke lo reta go';

¹⁹ per lo sen' ndon lo re men yodo', mas jwin nin gay' lan di's jwan' nchen men, sa te'd xa', nde ke nin si' mil di's jwan' na'yenta men.

²⁰ Wes na, ptan na, na'akta xgab go' xa nak xgab or bix, gok go' xa nak or bix, per lo re jwan'

naraxa, che'la le' go' pkeno xgab gol xajka men goxa.

²¹ Lo ley chan' Dios ngeni: "Xa'la di's nde xa'la ro men li rsin na nin lo yez re', nde nekla tamod na'gonta xa' xki's na, tamod ne Xa' Nyebe'."*

²² Jwan' nasa, lo ta ni men di's na'yenta men, jwan'na nak ti be' lo re xa' ta na'ndlid lazon' Dios, nde na'nakte par re men jwan' ndlila lazon' Dios. Per ta tej men jwan' ne Dios, jwan'na nak be' lo re men ndlila lazon' Dios nde na'nakte par re men na'ndlid lazon' Dios.

²³ Tak, tez re go' ta ndli lazon' Dios thita nzidop go', nde reta go' ni di's na'yenta men, nde tya nzi pla xa' jwan' na'nchenta o xa' na'ndlid lazon' Dios, ¿Cho na'gapta xa' ngosa' yek go'?

²⁴ Per tez reta go'ba tej jwan' ne Dios lo go', nde zin pla xa' jwan' na'ndlid lazon' Dios nde xa' na'nchenta, re xa' ya tlayek xa' nak xa' men nzo'b xken' nde le'ga xa' yolo xa' xken xa', lo gon xa' jwan' tej go'.

²⁵ Tak reta jwan' naga's nzo lazo' xa' troxo'ba nde tamod tyoxub xa' ta' xa' dyux lo Dios nde gab xa' liga ndo Dios xij go'.

²⁶ Jwan' nasa, wes na, ptan na, ¿Cho kwan ndablo lin' sa? Sen' lo ndyopbe go', nzo go' ndeno ti di, nzo go' tote'd men, nzo go' ni di's na'yenta men, nzo go' ko'xkan di's ya, nde nzo go' lo' jwan' mblo' Dios lo go'. Reta jwan' re' bli go'y sa xyen re men.

²⁷ Tez nzo go' ni di's na'yenta men, ben'ta chop go' o jwan' tozka son go' bliy nde thib thiba go' todì's nde yo ti men ko'xkana.

* 14:21 14:21 Is. 28:11-12.

28 Per tez na'ngenta men ko'xkana, mas jwin xeta pto' go' len' yodo', nde len' lazo'ta go' mni go' nde mni go' lo Dios.

29 Nde taga' re go' ta nak profet, nakin' ben'ta chopta go' o jwan' tozka son go' ni, nde tipla xa' gona nyen' cho gal' naka.

30 Mbay tez ti xa' ta ndoba, lo' Dios ti jwan' lo xa', zyasa xa' ta ndoni nera' nakin' na'todi'stra xa'.

31 Tak re go' ta ni Dios lon', thib thiba go' todi's, sa reta go' te'd nde reta go' yone lazon'.

32 Nde re xa' ta nak profet ndablo nye cho or ndablo ni xa',

33 tak Dios, na'ndokanta Xa' men, che'la nabe'z nak Xa'.

Lin' xa ndliga re men jwan' nak yodo' nayon chan' Dios,

34 re men got go' na'todi'sta xa' len' yodo', tak na'ndabloda todi's xa'. Nakin' xo'byek ngol, jwan' xa nyebe' ley chan' Dios.

35 Tez nzo kwan ncholas' ngol te'd ngol, liz ngol tya nyabdi's ngol lo sal' ngol; tak na'wenta ndlo'y ni ngol len' yodo'.

36 ¿Cho xij go' ba mdobte xki's Dios ndyak go', o ben'ta lo go' mzin xki's Dios ndyak go'?

37 Tez nzo xa' ndyak nak xa' profet o nzo xa' ndyak nak xa' men ni Mbi Nayon lon', ndablo nye xa' le' re jwan' ta ngeke'n lo go' re', Xa' Nyebe' mnabe'y.

38 Men jwan' na'nchola'sta li lazon' jwan' re', na'lid lazo' xa'y.

39 Jwan' nasa, wes na, ptan na, pchal go' tej go' jwan' ne Dios, nde na'kwesked go' lo xa' ta ni di's na'yenta men;

⁴⁰ per reta lo ned jwan' nabe'zta nde naxu'ta bli go'y.

15

Mbroxban Jesucrist

¹ Wes na, ptan na, ncholasa na tela's go' di's wen chan' Jesucrist jwan' mdej na lo go', di's jwan' mbli lazo' go' nde lo jwan' thibla' ndo go'.

² Nde taga', tez thibla' ndono go' xki's Dios jwan' xa mdej na lo go', mblya' go', per tez na'ndonod go', ben' anale mbli lazo' go'y.

³ Tak jwan' xata mte'd na, jwan'na mblo' ner na lo go'. ke Jesucrist nguj por reta xken na', a xata nchab lo xki's Dios;*

⁴ mbwa's Jesucrist nde lo ngoxo'b mbyon wis mbro'xban Xa', jwan' xatka nchab lo xki's Dios.†

⁵ nde mbro'to Xa' lo Pedr,‡ xisa mbro'to Xa' lo re tib sen xin te'd xa'.§

⁶ Xisa mbro'to Xa' masra' lo gay' ayo' men jwan' ndli lazon' Xa', bro re men ya ben' naban nde nzo xa' ngujla.

⁷ Xisa mbro'to Xa' lo Jakob*, nde xisa mbro'to Xa' lo reta xa' nak apóst.

⁸ Nde sen' ngolo mbro'to Xa' lo reta xa' ya, zyara' mbro'to Xa' lon, tak na nak xaja ti mbed ta ngol blus.†

* 15:3 15:3 Is. 53:5-12. † 15:4 15:4 Sal. 16:8-10; Os 6:2. ‡ 15:5 15:5 Lc. 24:34. § 15:5 15:5 Mt. 28:16-17; Mr. 16:14; Lc. 24:36; Jn. 20:19. * 15:7 15:7 Jakob re' nak Santiag, xa' ngok wes Jesus nde xa' re' mke' libr Santiag, xa' nak apost. † 15:8 15:8 He. 9:3-6.

⁹ Tak na jwan' mas lud ntak xij reta apóst nde na'nsal'ta na rolen apóst, tak na mchubla re men jwan' nak yodo' chan' Dios.‡

¹⁰ Per por yalwen chan' Dios nak na jwan' ta nak na re', nde nanaktey jwan' anale mda' Dios lon, tak na jwan' mas mbli sin' ke lo reta xa' nak apóst, nde na'nakta na jwan' mbliy, che'la yalwen chan' Dios ta ndonon mbliy.

¹¹ Nde ngen kwan liy tez na o xa'la apóst mdej xki's Dios lo go', tak thita jwan' mdej ná' lo go' nde jwan'na mbli lazo' go'.

¹² Le' ná' ndej Crist Xa' mbro'xban xij re men nguj ¿Cho kwan liy sa nzo men mbez xij go' na'ryo'xbanta re men nguj?

¹³ Tak tez nandryo'xbanta re men nguj, noga Jesucrist nambryo'xbanta.

¹⁴ Nde tez na'mbro'xbanta Crist, na'lida sin' jwan' ta ndej ná' nde na'lid sin' jwan' ta ndlipa lazo' go' ba.

¹⁵ Tez ta naka, nak na men kwin' lo ndej ná' xki's Dios, tak ná' ndej ke Dios mblo'xban Crist, jwan' namblo'xbanta Dios tez liga na'ndryo'xbanta re men nguj.

¹⁶ Tak, tez na'ndryo'xbanta re men nguj, noga Jesucrist na'ndro'xbanta.

¹⁷ Mbay tez na'mbro'xbanta Crist, na'lid sin' jwan' ta ndli lazo' go' ba nde tata ben' ndono go' xken go'.

¹⁸ Tez ta naka, noga re xa' ngujla, xa' jwan' mbli lazon' Jesucrist, thiptane mney lo xa'.

¹⁹ Tez ben'ta lo yalnaban re' ngetob na' xgab na' lo Crist, nzal'tir na' nalát nyan' wi' re men na'.

‡ 15:9 15:9 He. 8:3.

²⁰ Per le' jwan' li, liga mbro'xbanpa Crist xij re men nguj nde Xa' ngok Xa' ner jwan' mbro'xban.

²¹ Tak ta xa ti mbi' mbli sa mzin yalyuj, taga' ti mbi' mbli sa ryo'xban re men nguj.

²² Tak ta xa Adán ndli sa reta men nchaj, taga' Crist ndli sa reta men bere ban.

²³ Nde kad thibay ngenoy be' aka: Crist nak Xa' jwan' nerla mbro'xban nde sen' lo ye'd Crist tedib gob zyara' sa ryo'xban re men jwan' ta mbli lazon' Xa'.

²⁴ Axta zyara' sa lux izyo, sen' taya' Crist yal-nyebe' lo xud na' Dios, sen' ngolo mblux xa' re xa' ngeno yalnyebe', re xa' nak sin' nde reta yalne jwan' nzo.

²⁵ Tak nakin'ka nyebe' Crist axta kebe' re xa' ta nayi' lo Crist gax xa' xan' ni Crist. §

²⁶ Nde lultka lu'x Crist jwan' ta ngi'no ná, jwan'na nak yalguj.

²⁷ Tak Dios mbli sa reta jwan' nxo'byeka Crist.* Per jwan' ta nchab lo xki's Dios, reta jwan' nxo'byeka Crist, na'ngenide ke no Dios ndablo xobyek Xa' Crist, tak Dios jwan' mbli sa reta jwan' nxo'byeka Crist.

²⁸ Nde sen' reta jwan' nxo'byeka Crist, zyasa yub Crist, Xa' nak Xin' Dios xobyek Xa' Dios, Dios ta mbli sa reta jwan' nxo'byeka Crist. Tamod sa Dios ak Xa' naro lo reta jwan'.

²⁹ Tediba jwan', nzo xa' ndryo'le por ti men ngujla. ¿Cho kwan liy ta nya jwan' ndli xa'? Tez na'ryo'xbanta re men nguj, ¿Cho kwan liy sa ryo'le xa' por thi men ngujla?

§ 15:25 15:25 Sal. 110:1. * 15:27 15:27 Sal. 8:6.

30 ¿Mbay cho kwan liy sa reta wiz thibla' nzon' lo yalnathoz?

31 Lipaba wes na, ptan na, ta xa nale toz nzo lazo'n ta ndli lazo' go' Jesucrist Xa' Nyebe' lon', taga' reta wiz nzon lo yalnathoz chan' yalguj.

32 Yez Éfeso tya ngwan kwent kon pla mbi' jwan' nak xaja ma' tin, nde tez liga na'ryoxbanta re xa' nguj, ¿Cho kwan mblin gan lo jwan'na sa? Tya sa maska jwin xa mbezka rol men: “Wan' nde gun' nit tak ye' gaj na.”†

33 Na'ta'd go' di's kwin'no men go'. Xa nchabka di's: “Sen' nzal'ta men re xa' ndli jwan' narax zyasa nta'b men re jwan' wen ndli men”.

34 Blo go' xgab yek go' na'litra go' re jwan' narax, tak nzo pla go' tera' yolo Dios. Tamod mbez na lo go' sa tyola's go'.

35 Nde nzo xa' nya'bdi's: “¿Xomod ryo'xban re men nguj? ¿Xomod nya men sen' ryo'xban men?”

36 Pa nda xgab yek go' ta nya jwan' nyabdi's go', tak tez kobin la ti mbiz, ndablo gab xab ney sa ryo'xob ya bin.

37 Sen' ndli bin men ti jwan', na'ngobinta men ya, le' men ngobin mbiz, xa nak mbiz trig o xa'la ned mbiz.

38 Nde mod nchola's Dios ndlilal Dios mbiz nde kad ned mbiz Dios ndli xaxa' nxyen na.

39 Taga' xaxa' naksa' re ned jwan' naban, xa'la naksa' men nde xa'la naksa' re ma', xa'la naksa' re ned mbel nde xa'la naksa' re ned ma' ndob xil' na'.

† 15:32 15:32 Is. 22:13.

⁴⁰ Nde taga' nzo re jwan' ta nzi lo be' nde nzo re jwan' ta nzi lo izyo, nde na'lalta yalxna re jwan' nzi lo be', ke re yalxna jwan' nzi lo izyo.

⁴¹ Xa'la nya xni chan' wiz, xa'la nya xni chan' mbe', xa'la nya xni chan' re mbel nzi lo be' nde kad thiba mbel xaxa' nya xnin na'y.

⁴² Taga' nak yalryoxban chan' re men nguj. Nka's men ti bel' ta ncha's, nde ndryo'xban ti bel' nancha'sta.

⁴³ Nka's men bel' nalitra' sin' nde ndryo'xban ti bel' nawe nya. Nka's men bel' ta nadan, nde ndryo'xban ti bel' nxek.

⁴⁴ Len' izyo nda bel' men, sa ndryo'xban ti men nak xbi. Nzo jwan' toyal gal men, nde nzo jwan' naksa' xbi.

⁴⁵ Jwan' nasa nchab lo xkis Dios: “Adán mbi' ner ngo lo izyo ngok xa' ti men naban”;[‡] le' lult Adán jwan' nak Crist, Xa' ya nak xbi nda' yalnaban.

⁴⁶ Per Xa' jwan' nak xbi na'ngonerta xa' , che'la nerla xa' ta naksa' bel' ngo, zyara' mbye'd Xa' nak xbi.

⁴⁷ Mbi' ner ta ngo, xa' lo izyo re' xa', le' Mbi' brop, Xa' jwan' nak Xa' Nyebe', Xa' lo be' Xa'.

⁴⁸ Ta xa nak mbi' ner lo izyo re', ta nak reta men lo izyo, nde ta xa nak Xa' nzo lo be', taga' nak reta xa' nzo lo be'.

⁴⁹ Ta xa lal nyan' kon mbi' ta naksa' yothi', taga' lal ak na' kon Mbi' ta nzo lo be'.

⁵⁰ Wes na, ptan na, tej na ti jwan' lo go', bel' nde ren na'nyeda kaya'y yalnyebe' chan' Dios; tak jwan' ncha's na'gakta yonoy jwan' na'ncha'sta.

[‡] 15:45 15:45 Gn. 2:7.

51 Nche' tej na ti jwan' naga's chan' Dios lo go': Na'red na' gaj, per reta na' zye' nyan',

52 ta xa thib atil tir nchus ngud lo men ta aka, lo tyez lult trompet. Tak sen' tyez trompet, reta men nguj ryo'xban nde na'gastra bel' xa',§ le' re na' ta naban, zye' nyan'.

53 Le' bel' na' jwan' ta ncha'sa nakin' aka jwan' na'ncha'sta, nde bel' na' ta ndluxa yolala bel' na'ndluxta.

54 Sen' bel' na' ta ncha'sa yolala bel' na'ncha'sta nde bel' na' ta ndluxa yolala jwan' na'ndluxta, zyasa ak jwan' ta nchab lo xki's Dios: “Ngok gan mblux yalguj.*

55 ¿Yalguj, ma kós la ta nchuj men? ¿Ma yalne chan'la, ta ndlia gan?”†

56 Tak re jwan' narax, jwan'na nak kós chan' yalguj, nde ley nda' yalne lo jwan' narax.

57 Per dyuxkix toz Dios, tak Xa' mbli sa mblin' gan lo yalguj por Jesucrist Xa' Nyebe'.

58 Jwan' nasa, wes na, ptan na, nke' toz lazo'n go', thibla' ne pto go' lo xki's Dios nde thibka bli go' sin' lo Xa' Nyebe', tak mne go' le' sin' jwan' ta ndli go' lo Xa' Nyebe' na'nakte jwan' ben' nale ndli go'.

16

Tmi yon jwan' dyop kaya' re wes

1 Le' naya, tej na lo go' jwan' ta nthop go' tmi yon kaya' re wes nzi yez Jerusalén,* bli go' jwan' xa mnabe'n lo re wes nzi re yodo' yez Galacia.

§ 15:52 15:52 1 Ts. 4:15-17. * 15:54 15:54 Is. 25:8. † 15:55 15:55 Os. 13:14. * 16:1 16:1 Ro 15:25-26.

² Kad wiz ner xan' sman, kad thiba go' bloxa' go' lud tmi, ben' xa ndli go' gan nde blosa' go'y, sa sen' lo zin na na'nakin'ta zyara' thop go'y.

³ Tak sen' zin na lo go', zya tel na re wes ta mblo' go', sa yatan' xa' tmi yon lo re wes nzi yez Jerusalén nde tan ye's we xa', sa kaya' re wes xa'.

⁴ Nde tez jwin ngwi' go'y non ya, sa thita nda ná'.

Re jwan' li Pab

⁵ Sen' lo yal na, nakin' nerla ri'd na lo xyon Macedon,† tak a tyaga ri'dnda'b na, zyara' zin na Corint.

⁶ Nde ndlin xgab kwed na lo go' pla wiz, o kwed na dib be' jwan' nxyo'b yop, sa toyal la'sto go' na re ten' ndan.

⁷ Tak na'ncholasta na ben' thib atil ri'd na ten' nzi go', le'n ncholas bro tyemp kwed na lo go', tezka Dios ta' di's.

⁸ Le' naya kwed na yez Éfeso axta kebe' yoto ni Pentecostés.‡

⁹ Tak nche' nda' toz men di's lon nawe lin rsin' Dios, te'nye nzoga bro toz men jwan' ngi'no xa' xki's Dios.§

¹⁰ Nde tez zin Timoteo lo go',* bli go' sa yo nale lazo' xa', tak le' xa' ndli rsin' Xa' Nyebe' ta xa ndlin re'.

¹¹ Jwan' nasa nek thib go' na'ko'talta go' xa'. Che'la, thibka nabe'z bla'sto go' xa', sa ye'dtwi' xa' na, tak na nde kon tipla wez ngembed na' xa'.

† 16:5 16:5 He. 19:21. ‡ 16:8 16:8 Lv. 23:15-21; Dt. 16:9-11.

§ 16:9 16:9 He. 19:8-10. * 16:10 16:10 1 Co. 4:17.

12 Mnab toz na lo Apolos sa yatwi' xa' go' kon re wez, per tera' yo yek xa' ya xa', per nde ti wiz tli xa' gan yatwi' xa' go'.

Lult dyux chan' Pab

13 Thibla' nalas bre go' nde ne pto go' lo jwan' ndli lazo' go'; ne ptosa' go' nde blo ne lazo' go'.

14 Reta jwan' ndli go', bli go'y kon yalke'lazo'.

15 Wes na, ptan na, mnela go' dib liz Estéfanos,[†] xa' ya nak xa' ner jwan' mbli lazon' xki's Dios lo xyon Akaya, nde dib liz xa' ndli sin' lo re men jwan' ndli lazon' Dios.

16 Jwan' nasa nya'b na lo go', gon go' di's ro re xa' jwan' nak, xa nak re men liz Estéfanos nde taga' gon go' di's ro re xa' jwan' ndla'sto re men nde re xa' ndli sin'.

17 Nale nzo lazo'n mbye'd Estéfanos, Fortunat nde Akaiko, re xa' re' mbla'ston sen' nandlid go' gan tak na'ngenta go'.

18 Re xa' ya mblo ne lazo'n nde mblo ne xa' lazo' re go' lo xned Dios. Jwan' nasa nakin' nabe'z bwi' go' re men ya.

19 Re men yodo' nzi lo xyon Asia ntel' xa' dyux lo go'. Aquil nde Pricil[‡] nde kon re men yodo' jwan' ndyop liz xa', ntel' toz xa' dyux lo go' lo le Xa' Nyebe'.

20 Reta wes na', ptan' na' ni xa' dyux lo go'. Mni go' dyux lo ta go' kon chut nayon.

21 Na, Pab, yub na nke' lult di's re' sa nin dyux lo go'.

[†] 16:15 16:15 1 Co. 1:16. [‡] 16:19 16:19 Hch. 18.2.

²² Men jwan' na'nke'd lazon' Jesucrist Xa' Nyebe', xa' ya kan' de chan' Dios. ¡Le' Xa' Nyebe' nde!

²³ Yalwen chan' Jesucrist Xa' Nyebe' tyono go'.

²⁴ Nke' lazo'n go' ta xa nke' lazo' Jesucrist go'. Ta aka.

**El Nuevo Testamento en el idioma Zapoteco
de Loxicha**
**The New Testament in the Loxicha Zapotec language
of Mexico**
El Nuevo Testamento en el idioma Zapoteco de Loxicha
copyright © 2025 Wycliffe Bible Translators, Inc.

Language: Loxicha Zapotec (Zapotec, Loxicha)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

968619e6-cca2-5898-b8d1-3b961f3e1c32